

# ЎЗБЕКИСТОН РЕСПУБЛИКАСИ

## ОЛИЙ ВА ЎРТА МАХСУС ТАЪЛИМ ВАЗИРЛИГИ

### БУЙРУҚ

Тошкент шаҳри

2011 йил "5" декабрь № 457

#### Намунавий тартиб ва низомларни тасдиқлаш ҳақида

Ўзбекистон Республикаси Вазирлар Маҳкамасининг 2004 йил 20 июлдаги 341-сонли қарори билан тасдиқланган Ўзбекистон Республикаси Олий ва ўрта махсус таълим вазирлигининг Низомига мувофиқ

#### Б У Ю Р А М А Н :

1. “Магистрлик диссертациясини тайёрлашнинг намунавий тартиби”, “Олий таълим муассасасининг кафедралари тўғрисида”, “Олий таълим муассасасининг факультети тўғрисида” ва “Олий таълим муассасасининг Илмий кенгаши тўғрисида”ги намунавий низомлар 1-4 иловаларга мувофиқ тасдиқлансин.


2. Ушбу намунавий низомлар Ўзбекистон Республикаси Халқ таълими вазирлиги, Соғлиқни сақлаш вазирлиги, Маданият ва спорт ишлари вазирлиги, Қишлоқ ва сув хўжалиги вазирлиги, Ўзбекистон алоқа ва ахборотлаштириш агентлиги, Ўзбекистон Бадий академияси, “Ўзбекистон темир йўллари” ДАК, Давлат солиқ кўмитаси, Ташқи ишлар вазирлиги, Навоий кон-металлургия комбинати таклифлари ва келишуви асосида, шунингдек Адлия вазирлигининг тавсияларига кўра ишлаб чиқилганлиги инобатга олинсин.

3. Олий таълим муассасалари ректорларига:

олий таълим муассасасининг тегишли таркибий бўлинмалари (кафедра, факультет, магистратура, Илмий кенгаш) ҳақидаги низомларини қайта ишлаб чиқишда, шунингдек уларнинг фаолиятини ташкил қилишда мазкур тартиб ва низомлардан намунавий ҳужжат сифатида фойдалансин.

4. Ушбу буйруқ ижросининг назорати вазирнинг биринчи ўринбосари М.Арипджанов зиммасига юклатилсин.

Вазир



*Б. Ходиев*

Б.Ходиев

## Магистрлик диссертациясини тайёрлашнинг намунавий тартиби

Мазкур Низом Ўзбекистон Республикасининг “Таълим тўғрисида”ги (Ўзбекистон Республикаси Олий Мажлисининг Ахборотномаси, 1997 й. 9-сон, 225-модда) ва “Кадрлар тайёрлаш миллий дастури тўғрисида”ги (Ўзбекистон Республикаси Олий Мажлисининг Ахборотномаси, 1997 й. 11-12-сон, 295-модда) қонунларига ҳамда Ўзбекистон Республикаси Олий ва ўрта махсус таълим вазирлигининг 2007 йил 29 декабрдаги 269-сонли буйруғи билан тасдиқланган “Магистратура тўғрисида”ги Низомга мувофиқ магистрлик диссертациясини тайёрлаш тартибини белгилайди.

### I. Умумий қоидалар

1. Ушбу Намунавий тартиб олий таълим муассасалари ва талабалар (магистрантлар) учун тавсиявий хусусиятга эга.

Магистрлик диссертацияси (бундан кейин матнда - диссертация иши) магистратурада таълим олаётган талабанинг ўқиш даврида эгаллаган назарий ва амалий билимлари асосида бажарган илмий-тадқиқот ишларининг натижаси ҳисобланади.

2. Диссертация иши мавзуси ишлаб чиқариш, таълим, иқтисодиёт, фан-техника, ижтимоий соҳаларнинг долзарб масалаларга бағишланиши, муайян бир вазифанинг илмий асосланган ечимини топишга, тавсиялар ишлаб чиқишга, статистик маълумотлар таҳлилига қаратилган бўлиши шарт.

Тўлов-контракт асосида таълим олаётган талабалар томонидан бажариладиган диссертация ишлари мавзулари буюртмачи ташкилотлар томонидан таклиф этилиши мақсадга мувофиқ.

Диссертация иши мавзулари мутахассислик кафедралари йиғилишларида муҳокамадан ўтказилади.

3. Диссертация иши мавзулари ва илмий раҳбарлар кафедра тақдимномасига мувофиқ “Магистратура бўлими” тавсияси асосида биринчи ўқув йилининг иккинчи семистри бошланишига қадар ректор буйруғи билан тасдиқланади.

4. Тасдиқланган диссертация иши мавзулари талабаларга биринчи ўқув йилининг иккинчи семистри бошлангандан кейин икки ҳафта давомида тақдим этилади.

5. Диссертация иши мавзулари тақдим этилганидан кейин бир ҳафта муддатда илмий раҳбар билан биргаликда талаба (магистрант)нинг ўрнатилган шаклдаги “Шахсий иш режаси” ишлаб чиқилади ва ўқув ишлари бўйича проректор томонидан тасдиқланади.

## **II. Магистрлик диссертацияси таркиби ва мазмуни**

6. Диссертация иши қуйидаги таркибий қисмлардан иборат:

титул варағи (илова 1);

мундарижа;

кириш;

асосий қисм (2-3 бобдан иборат);

хулоса;

фойдаланилган адабиётлар рўйхати ва иловалар.

7. Мундарижада кириш, боб ва параграфлар номлари, улар жойлашган саҳифа бетлари кўрсатилади.

8. Кириш қисмида мавзунинг долзарблиги, диссертация ишининг мақсад ва вазибалари, амалий аҳамияти, илмий янгилиги, тадқиқот объекти, предмети ҳамда диссертациянинг тузилиши (ҳажми, расмлар ва жадваллар, фойдаланилган адабиётлар сони) ёритилади.

9. Диссертация ишининг асосий қисмида мавзу бўйича шу кунгача амалга оширилган ишлар, эришилган натижалар, янгиликлар, ихтиролар, меъёрий кўрсаткичлар таҳлил қилинади ҳамда уларга таянган ҳолда илгари сурилаётган ғоя ва фикрлар илмий жиҳатдан асосланиб тегишли ечимлар, таклифлар тавсия этилади.

10. Диссертация ишининг хулоса қисмида тадқиқот натижасида чиқарилган хулосалар ва аниқ таклифлар, шу жумладан, диссертация ишини бажариш даврида магистрантнинг шахсан эришган натижалари ҳам мужассамлаштирилади. Қисқа хулоса ва таклифлар диссертация ишининг айрим боблари якунида ҳам берилади.

11. Диссертация ишини бажариш жараёнида фойдаланилган ва ўрганиб чиқилган адабиётлар, шу жумладан хорижий адабиётлар, меъёрий ҳужжатлар, нашр қилинган илмий мақолалар, олинган патентлар рўйхати ва Internet маълумотлари матнда ишлатилиш кетма-кетлигида берилади. Магистрлик диссертациясининг сифатини янада ошириш мақсадида тегишли мавзу юзасидан камида иккита мақола тайёрлашни тавсия этилади.

12. Иловалар қисмида диссертация ишининг айрим бўлимлари учун зарур бўлган кўргазмалар чизма, схема, жадвал ва расмлар келтирилади.

## **III. Магистрлик диссертациясини расмийлаштириш ва ҳимоя қилиш**

13. Диссертация иши талаба ўқиган тилда, кафедра тавсиясига мувофиқ хорижий тилларда ҳам ёзилиши мумкин. Хорижий тилда бажарилган ишга давлат (ёки рус) тилида аннотация илова этилади ҳамда диссертация ҳимояси хорижий тиллар кафедраси ўқитувчиси иштирокида таржима билан ўтказилади.

14. Диссертация ишининг ҳажми 60-80 варақ матндан (иловалардан ташқари) иборат бўлиб, А4 (21x29) формат қоғозга компьютерда 1,5 интервалда, 14 шрифтда ёзилган бўлиши шарт. Матннинг чап томонида 30 мм, юқори